



吾學編

皇明名臣記

四
五
六
七
八

九

德慶堂


皇明名臣記第四卷

吾編第二十五

海鹽鄭曉

靜誠陳公

公名遇字中行金陵人天資沉粹篤學博覽元至
正中授江東明道書院山長温州路教授元末棄
官歸安淡守約自名靜誠人稱之為靜誠先生每
日焚香拜天願早生仁聖救此劊殘 上定金陵
南臺侍御史秦元之薦公宜顧問左右即日召見
與語大悅每稱先生三幸其第與官輒辭不就
上既即位問保國安民大計公以不嗜殺人薄歛



任賢爲對再除翰林學士固辭嘗奉密命至浙江
還奏稱旨賜金除禮部侍郎又固辭會疾醫療頻
至病愈入謝 上望見連呼君子君子除禮部尚
書又固辭自是不煩以務每從容燕見賜坐侍食
談說經史古今成敗孝弟仁慈事公溫良謹恪人
有過被 上譴力爲解 上喜公誠篤每聽公言
嘗曰卿老矣有子可帶刀衛朕公頓首伏地辭年
七十二卒賜賻祭加東園秘器季子恭舉人累官
通政贈公大理少卿公第中復嘗隨公侍 上永
樂初爲翰林待詔繪事精雅中復子孟顥善書

上以武功創業顧喜接耆儒時江西鈇山龔敷學
博行淳鄉鄙人皆向慕敷國初以明經爲府學教
授御史葉孟芳薦徵至洪武十三年秋 上坐武
英殿西廡見諸儒使言志皆對曰不敢上負 聖
主自棄明時 上喜始置四輔官以王本杜佑及
敷爲春官杜敷趙民望吳源夏官秋冬官缺令兼
攝未幾敷致仕十四年起爲國子司業陞祭酒杜
敷壺關人勤慎力學精通易書詩爲四輔官兼太
子賓客後以疾卒源興化儒學教授洪武十三年
中書舍人林廷綱薦源德行本以儒士行誼著聞

召

祭酒樂公

公名韶鳳全椒人博學能文章有智畧謹厚自持
乙未從渡江參贊機事洪武三年授起居注四年
轉給事中遷中書省員外郎再陞兵部侍郎尚書
六年改侍講學士修 大明日曆重定洪武正韻
更製釋奠先師樂章尋移病免八年召拜國子司
業未幾陞祭酒尋致仕歸以壽終弟暉人材進遷
開封知府太常卿教爲諸暨州同知並知名公有
友人趙奎王才魯文質陳旭陳友此五人者並起

畝澮從 上渡江取采石奎體貌魁岸有材畧立
功授總管守宜興洪武四年從征甘肅猝遇敵衆
畏怖奎獨奮殊死戰敗之 上喜旭英毅多智識
友有膽氣常居前鋒才充材武文質攻醫授太醫
院判奎才並都指揮使旭從靖難封雲陽伯友平
蠻功封武平伯旭友語在異姓諸侯傳

祭酒劉公

公名崧字子高太和人七歲能賦詩洪武三年以
材學舉職方郎中陞北平按察副使坐事輸作京
師歸鄉十三年胡丞相誅上手勅召爲禮部侍郎

未幾署吏部尚書請老與勅致仕十四年召致仕
刑部尚書李敬爲國子祭酒起公司業公至 上
喜賜鞍馬未旬日遽得疾猶強坐訓諸生疾革敬
問所欲言曰天子遣崧教國子將責以成功而遽
死乎無一語及家事年六十一 上爲文祭公公
博學有志行家素貧及貴未嘗增產業居官十歲
不以妻子相隨清苦如布衣時其爲北平按察副
使携一童往至則遣還每夜孤燈一榻讀書不輟
五更衣冠起坐待旦招徠逋逃慰安反側惟務寬
厚存大體尤慎威刑小人險狡輒先事防制温顏
巽詞而見者凜然致仕歸益謙下問學之功老而
彌篤與人言未嘗及官政文雅粹詩有唐人風韻
所著有北平八府志及詩文十八卷藏于家職方
集行于世

祭酒陶公

公名凱字中立臨海人博學善屬文洪武初薦與
修元史選授太子書尋除翰林應奉文字三年超
陞禮部尚書四年請建奉先殿乾清宮左 上日
焚香朔望薦新及節序生辰祭用常饌行人禮
上從之公每議禮與藁城崔亮相可否亮亦有

學識善論奏是歲請選人專任東宮官罷兼領職
庶輔導有所責成 上曰古者不備官惟賢能是
用朕以廷臣有才望勲德者兼東宮官非無謂也
嘗慮廷臣與東宮官有不相能遂成嫌隙或生奸
謀離間骨肉其禍非細若江充事可爲明鑑朕今
立法令府省臺官兼東宮贊輔之職父子一體君
臣一心庶幾無相搆之患五年公言漢唐皆有會
要記載時政及起居注記言記事宜令臺省府各
置銅匱簿錄 聖旨及時政依會要編類爲書
上從之出爲湖廣叅政致仕八年召爲國子祭酒

尋老復以叅政致仕自稱耐以道人 上聞之怒
曰何自賤也尋竟坐罪初牛諒與公同爲禮部尚
書以怠職犧牲不中廢功臣廟不葺降主事尋復
尚書未幾坐不職罷公姿性過人才高學博識見
卓遠爲文千言汨汨不見有艱難意初遊吳楚文
多激慨中更亂離去居深山中授經養親文多隱
約明興應聘而起凡稽古禮文事多公論定又兼
領翰林院事詔令封冊歌頌碑碣時時命公文章
遂盛傳於世時有潼州楊訓文者元淮海書院山
長遇亂不能去居江都吳元年徵爲起居注 上

稱訓文謹厚諭令始終一致兩遷中書省左司郎
中改太常卿知湖州府移知汀州入禮部亦與公
同爲尚書已而改戶部出爲河南行省叅政洪武
五年卒訓文學行政事有名亮初爲禮曹主事累
遷濟南知府憂去洪武元年召爲禮部尚書滕毅
不知何許人與訓文同以儒士徵從事徐相國幕
下授起居注 上命集古無道之君如桀紂秦皇
隋煬事以進曰往古人君善惡皆朕龜鑑也洪武
元年初設六部首擢毅爲吏部尚書召見面諭令
盡職

太子少保唐公

公名鐸鳳陽人庚子從攻江州授西安縣丞召還
中書省管勾出知延平府三載召爲殿中侍御史
復出知紹興陞刑部尚書改太常卿內艱賜半俸
服闋除兵部尚書改諫議大夫坐事左遷監察御
史尋陞右副都御史復爲兵刑二部尚書初立詹
事院兼詹事食尚書祿未幾致仕已而改院爲府
復起爲詹事食尚書祿尋致仕再起爲太子賓客
尋陞太子少保二十八年使龍州諭趙宗壽還復
出叅議總兵楊文軍事經畫守衛撫輯蠻獠公重

厚慎密靖廉不妄取予 上初起兵時即侍左右
每以故舊遇之僚屬罪數連公 上念公篤行皆
不問時諸卿中詹徽以才勝公以德勝然不動聲
色而政務修理人咸愛之 上嘗曰都御史詹徽
刑部掌部事唐鐸二人性行不同下人事之亦異
徽剛斷嫉惡不容奸僞役吏髮蓬面垢容愁肌瘦
不異羈囚以不得肆其貪故若是鐸始友及臣至
今三十四載交不知變色口不出惡聲德有餘而
才稍不足屢被小人誑誤極刑者數矣朕深知其
德曲宥弗罪奸人忌徽剛則謗訕滿朝鐸厚重無
疵又謂懦而無爲一切文移計稟皆舞文弄法愚
鐸賄賂公行鐸無可奈何嗚呼聰明決斷者以爲
非淵德海涵者以爲愚人之心不古若此邪三十
年卒年六十九卹賻最優

尚書郁公

公名新臨淮人洪武二十二年除戶部度支主事
賜名新明年陞北平部郎中又明年超授戶部右
侍郎考滿 上廷中對群臣稱新才陞尚書公尚
書戶部凡十三年綜理甚密而取民有節 上嘗
問天下戶口田賦地里險易計數公應機響答無

遺謬時親王歲祿米五萬石他賜物又萬石公議定歲一萬石并定郡王將軍中尉主君祿建文中調兵食効勞靖難後復戶部尚書永樂元年言淮河間多淺灘跌坡阻運舟請自淮安用船可載三百石以上者運入淮河沙河至陳州潁溪口跌坡下復以淺船可載二百石以上者運至跌坡上別以大船載入河至八柳樹諸處令河南車夫陸運至衛輝入衛河輸北京二年上屯田賞罰例三年卒 上顧解公縉等嘆息稱新才新理邦賦能會計量入出今誰可代新者公篤實有禮家素餘財

慷慨豪舉喜賓客樂賑施

尚書詹公

公名同字同文徽新安人少穎悟好學元舉茂才異等爲郴州學正避亂黃州事漢爲翰林學士承旨兼御史甲辰兵下武昌見 上授國子博士陞考功郎中丙午爲起居注 上命有司訪求古今書籍藏秘府資覽閱因謂公曰三皇五帝之書不盡傳于世後鮮知其行事漢武帝購遺書六經始出唐虞三代之治始可得而見武帝雄才大畧後世罕及至表章六經開闡聖學又有功於後世吾

每於宮中無事輒觀孔子之言如節用愛人使民以時真治國之良規孔子之言誠萬世師也吳元年上諭公等曰國史貴直筆是非善惡昔唐太宗觀史雖失大體然命直書建成事是欲以公天下也子平日言行是非善惡汝等皆當直書勿隱諱使後世觀之不失其實是年自翰林待制遷直學士明年陞侍讀學士上嘗諭公曰古人文章明道德通世務如典謨之言皆明白易知無深怪險僻之語孔明出師表亦何嘗雕刻爲文而誠意溢出至今使人誦之自然忠義感激近世之士辭

雖艱深意實淺近即使過於相如楊雄何禪實用自今翰林爲文但取通道術達時務者無事浮藻洪武四年陞吏部尚書六年爲翰林學士承旨兼吏部尚書上言陛下起兵渡江以來征討平定之蹟禮樂治道之詳雖有紀載向未成書乞編日曆藏之金匱傳於後世上從之命公與侍講學士宋訥爲總裁官七年五月大明日曆成自上起兵臨濠至六年癸丑冬十二月凡征伐次第禮樂沿革刑政設施群臣功過四夷朝貢之類莫不具載爲一百卷藏金匱副在秘書監公及宋訥又言

日曆藏之天府人欲見之有不可得臣請如唐太宗貞觀政要分類更輯聖政爲書以傳天下後世上從之分四十類自敬天至制蠻夷凡五卷名皇明寶訓自後凡有聖政史官日紀錄之隨類增入尋以翰林學士承旨致仕未幾復爲承旨翰林學士卒子徽歷官監察都御史改僉都御史洪武十七年陞左都御史十九年上以徽奉職公勤復其家二十二年爲吏部尚書兼左都御史明年以徽子太子洗馬紱爲尚寶司丞二十五年加太子少保兼吏部尚書都御史與李太師不相能徽殿城門坊扁皆希原書徽後坐監黨死

尚書開公

從子希原爲中書舍人善大書兼歐虞韓柳凡宮公名濟字來學一字學臣洛陽人嘗自比賈誼以明經舉爲府學訓導陞國子助教與胡丞相善以疾罷歸訓徒里中洪武十四年御史大夫安然薦公有治才召試刑部尚書未幾爲真公勤敏有爲嘗奏令司置考功圖日書所行事稽覈勤怠上喜賜大第甚宏麗曰有司以此爲式十五年監察御史趙仁言曩以賢良方正聰明正直孝第力田

文學之士列置郡縣政績少聞又聘天下秀才以
資任用臣愚以知人不易莫若考其經明行脩達
於政事者爲一等通曉四書才兼幹濟者爲一等
量才授職往代舊官其既代之官就令布按二司
覈其稱職平常不稱職給文赴吏部再覈去畱
上覽其言謂公等曰秀才今徵至數千人宜嚴試
授職公等條議乞選有才識文武之臣公暇延訪
秀才以經明行修爲一科工習文詞爲一科通曉
四書爲一科人品俊秀爲一科言有條理爲一科
曉達治道爲一科六科備者爲上三科以上爲中

三科以下爲下不通一科者不在擢中 上從之
公敏慧有才辯凡國家經制田賦獄訟工役河渠
事衆莫能裁定得公一筭畫即有條理品式可爲
世守公得 上信任益奮勵效職他部事輒兼理
人忌其才高又見 上每召公議事謗言遂起竟
暴卒

大學士吳公

公名伯宗金谿人洪武四年進士第一人時初開
科取士賜袍笏冠帶擢禮部員外郎命與學士宋
訥同修大明日曆胡惟庸方用事欲人附已公性

剛直不肯相屈下惟庸恨之八年惟庸竟中傷公
謫居鳳陽公上書論時政因言惟庸專恣不法不
宜獨在中書恐久之為國患辭甚剴切上得奏
即召公還賜衣鈔使安南得馴象方物以歸為國
子助教十二年進講東宮陳正心誠意之說明年
改翰林典籍上製十題命賦公援筆立就詞語
峻潔上曰伯宗才子賜織金錦衣十四年除太
常寺丞辭明年改國子司業又固辭由是忤旨貶
陝西金縣學教諭至淮安召還為翰林檢討十五
年初設殿閣學士公為武英殿大學士十六年冬
宮使交成均玉堂諸集

大學士吳公

公名沉字濬仲金華人故元國子博士師道子博
學善屬文國初舉為縣學訓導疾辭洪武十二年
薦授翰林待制明年降編修尋復為待制十五年
應對失旨左遷渭源學教諭未行改翰林典籍陞
東閣大學士十六年進精誠錄錄三卷言敬天忠
君孝親事皆述五經四書語上命公為敘時撰

千家姓公爲表進未幾考功劾怠事降侍書尋改
國子博士十九年秋致仕公嘗著辯言孔子封王
爲非禮自是布政使夏寅祭酒丘濬皆以封孔子
王及謚爲非禮

學士劉公

公名三吾字如孫以字行初名崑茶陵人嘗避兵
廣西行省承制授靖江教諭遷儒學副提舉王師
下廣西歸茶陵洪武十七年通政使茹瑺薦徵至
老矣應對詳慎 上喜除左贊善歷陞翰林學士
公博學通經史文章典麗旣入翰林備顧問每預

密議懿文太子卒 上意在 文皇問公對曰呈

孫年富世適之子子沒孫承適統禮也即立燕王

置秦晉二王何地 上領之遂立建文君爲皇太

孫十八年三月上省躬錄初 上命儒臣編古帝

王祭祀灾祥感應可爲鑒戒者爲存心錄旣又命

公編漢以來灾異之應臣下者爲書賜名省躬錄

云二十三年授晉世子經坐怠慢爲吏部侍郎侯

庸劾降國子博士未幾復學士二十六年以婿趙

勉爲戶部尚書坐罪乞免官未幾又復學士 上

厭表箋多諛詞織巧命公及右贊善王俊華撰定

頌天下尋暴卒

論曰靜誠抗志辭榮終被恩遇三祭酒積學勵行
模範克修唐公才非不逮有容德焉郁公精敏善
理財亦能任怨詹公留心史事後無繼者至今百
七十餘年遺文故事闕焉無聞開公長才博識政
有體要雖爲刑官兼裁衆臧兩吳公文而不靡質
而不俚劉公叔孫繼統之對不可誣也

皇明名臣記卷之四終

子履準校正

皇名明臣記第五卷

吾學編第二十六

海鹽鄭曉

河間張忠武王

王名玉字世美祥符人仕元爲樞密知院洪武十
八年自拔來歸二十一年從征捕漁海子哈喇哈
授濟南衛副千戶又從勦粉紅帖木兒至延安陞
安慶衛指揮僉事二十三年從征永順散毛諸洞
明年逐北虜至雅寒山還調燕山左護衛二十六
年追虜至黑松林明年征野人陞都指揮同知建
文君初即位稱繩削親藩 成祖舉兵靖難王謀

畫為多事可否進止衆論未定者王正色數語立
決首用王策奪北平九門撫順鋤強三日城內外
悉定師將南出王曰不先定薊州將為後患會馬
宣起兵薊州迎拒王攻之宣率衆出戰執殺宣并
執毛指揮使是夜急趨遵化戒將士止殺曰師行
以得人心為本簡敢勇士四鼓登陴開其城門將
士皆入城中始覺守將率衆拒戰執殺之不傷一
人分兵永平密雲皆望風輸欵從 上至灤河王
進曰都督潘忠楊松在漠州阨吾南路宜先擒之
上 悅立發兵曰汝為先鋒遂攻涿州雄縣擒潘

楊二都督時長興侯耿炳文率兵二十萬屯真定
王自請往覘敵還言軍無紀律且其上有敗氣無
能為 上至無極以敵衆我寡欲試諸將勇怯召
問今兵所向度可必勝否衆未有說王曰今當徑
趨真定彼衆新集我軍乘勝一鼓可破也 上曰
善吾倚玉一人足辦吾事抵真定接戰炳文大敗
獲其左右副將軍李堅審忠及都督顧成等斬首
三萬餘級獲馬二萬復敗安陸侯吳傑軍永平馳
報江陰侯吳高等以遼東兵圍城急又諜報曹國
公李景隆引兵數十萬將攻北平城 上與王謀

東援永平既至高等望風棄輜重遁王從 上追
斬甚衆王言大寧去此不遠請移軍襲之可免後
顧 上從之遂收大寧殺其都指揮朱鑑北平報
景隆兵圍城急遂旋師王請搗景隆營大戰三日
城中亦鼓譟出表裏夾攻景隆軍不支大敗遁去
從攻廣昌大同悉下謀報景隆收潰卒號百萬且
復至王言兵貴神速先事者勝請往駐白溝河以
逸待勞 上命王率衆馳駐河上三日景隆兵至
王以騎兵接戰景隆復大敗收餘卒退保濟南乘
勝追擊圍其城既而解圍還攻滄州獲其大將徐

凱進攻東昌敵列陣決戰 上以數千騎繞出陣

後敵圍 上數匝衝擊得出王不知 上所在突

入敵陣大戰連殺百數十人王竟被劊歿年五十

八 上哭既旋師諸將侍語及東昌事 上曰勝

負兵家常事不足計所恨艱難之際失玉令吾寢

不帖席食不下咽隕涕不已諸將皆泣 上即位

論功顧侍臣曰玉才備智勇論靖難功當第一惜

其蚤歿贈奉天靖難推誠宣力武臣特進榮祿大

夫右柱國追封榮國公謚忠顯 仁宗在春宮數

與侍臣言王識見謀畧卓然老成非諸將所及且

端方有匡直之益洪熙元年加封河間王改謚忠武侑享 成祖廟廷子輔別有傳

東平朱武烈王

王名能字士弘懷遠人父亮國初功世燕山護衛正千戶王嗣官事 成祖藩邸建文元年起兵靖難王及河間王首議縛三司奪九門即引兵東攻薊州敗都指揮馬宣兵拔薊州度石門又拔遵化襲破大寧還兵破雄縣漢州擒都督楊松長驅至真定敗長興侯耿炳文再戰滹沱河王躍馬大呼突陣敗炳文兵還鄭村壩破九門兵又敗平安兵

白溝河二年攻濟南追戰敗鉞山下戰東昌盛庸鐵鉉力戰圍 上數匝平安兵又至圍益急王率周長等兵合胡騎奮戰 上潰圍東北角出還營王在諸將中最年少善戰河間王善謀戰沒東昌軍事一諮王是年歷陞都指揮同知三年收合諸軍將薛祿等進戰夾河擒都指揮張安夾河之戰潭淵死靖難兵窘得王至再戰勝軍聲復振敗盛庸兵藁城三戰三敗之遂率王與陳亨諸將攻真定王先鋒衝庸中堅殺幾萬人擒都督顧成出奇兵截南兵哨騎連戰順德大名彰德衛輝皆有功

戰西嘉山破定州十月戰蠡南兵大潰是年陞都督僉事四年克東阿進攻東平殺判官鄭華盡破汶上諸寨至小河王真戰死平安兵大捷靖難諸將議旋師王獨按劍奮罵諸將曰漢高祖十戰九敗終有四海今舉事連捷小挫輒歸更能北面事人耶諸將皆大不忠當斬衆遂定 上引兵南下大戰大店又戰小河橋又大戰齊眉山連捷盛庸平安等合兵六十萬依潼山爲陣王率李遠等設奇四面進攻大敗平安等銀牌軍都督陳暉來援安又敗暉擒平安等三十人降十萬衆六月渡江

進屯金川門夜漏下五刻門開定京城建文四年封成國公食祿二千五百石與世券永樂四年克征夷將軍率二十五將軍討安南加祿千石至龍州卒能身長八尺沉毅驍果善拊士卒被服常依儒生追封東平王謚武烈侑享 成祖廟庭子勇嗣正統十四年扈駕北征虜卒至勇引兵五萬迎擊冒入鷓兒嶺中虜伏戰歿隻騎不返子儀乞葬祭不許停侯景泰二年詔已巳諸將敗衄者皆受朝廷成筭陣亡成國公修武伯與子襲爵贈勇平陰王謚武愍儀始得嗣守備南京三十餘年卒贈

太師謚莊簡弘治九年子輔嗣守備南京卒贈太
傅謚榮僖子麟嘉靖四年嗣卒八年弟鳳嗣卒子
希忠嗣累加太傅兼太子太師入直西苑

定興張忠烈王

王名輔河間忠武王子也靖難功歷陞指揮同知
辛巳嗣父都指揮同知統兵戰夾河藁城彰德
靈璧有功壬午九月封信安伯食祿一千石與世
券永樂三年以父功進新城世侯加祿三百石四
年克征夷右副將軍佐成國公討交趾成國公卒
軍中進王大將統二十五將軍兵八十萬入賊境

賊沿江列柵六七百里水陸拒守我師至江口破
其堅壁遂拔多邦城進攻破交州乘勝引兵感清
化覆其巢穴降夷民十餘萬季犛遁入海屯兵鹹
子關賊襲我逆擊敗之五年督舟師進攻斬馘數
萬追至奇羅海口擒季犛并其二子蒼澄交南平
得郡縣一百三十四戶三百一十二萬上議復古
郡縣置交趾都布按三司六年進封英國公食祿
三千石是年交賊簡定又反王率師二十萬討之
七年獲簡定召還京八年交賊陳季擴又反稱復
陳氏王又出討之賊走海洋據險荷花口王率兵

促之至愛子江登岸賊設象伏我王偵知令先驅
日群象來衝一矢落象奴再矢披象鼻象奔還自
相蹂大軍乘之賊敗十二年縛季擴十三年留王
鎮守盡平餘寇十四年召還京二十年從上北
征胡二十三年冊王女爲貴妃洪熙元年加太師
改王從兄兵部右侍郎信爲錦衣世指揮同知宣
德元年漢王謀反密遣人通王王母賢令王縛見
上得早覺從上親征加祿歲三百石顧佐爲
都御史請保全功臣王辭兵權時時與蹇夏三楊
諸大臣侍上左右備顧問正統十四年從駕出

土木敗績王歿景泰元年贈定興王謚忠烈王三
征交趾皆與沐晟偕王功爲多王噐宇雄壯顧盼
有威不妄言笑歷事昭章睿皇皆重王武臣恭慎
有禮長子忠勲衛病忠庶子傑乞嗣王弟文安伯
輓太平侯輓言傑本忠婢子不可嗣景泰五年王
庶子懋嗣懋謹恪好禮守法知兵歷三營十二營
總兵累加太師正德十六年卒贈寧陽王謚恭靖
子崙嗣卒嘉靖十四年卒子溶嗣

平江侯陳恭襄公

公名瑄字彥純合肥人父聞開國功歷陞成都右

衛指揮同知公嗣父謫戍遼陽公請代原戍從征
卜木瓦寨冒險先登敗賊復從征餘寇賈哈刺一
日十三戰明日又七戰擒賈哈刺陞四川行都司
同知進督府僉事建文時召防江靖難兵至江上
具舟迎降封平江伯食祿千石世指揮使永樂初
北京遼東軍儲不足克總兵都督宣信爲副帥舟
師海運歲米百萬石請建百萬倉直沽尹兒灣城
天津衛籍兵萬人戍守舟經海島下令交市人不
敢譁兩便之會有倭劫沙門島公以漕舟追至朝
鮮境盡焚其舟殺溺死者甚衆三率舟師備倭閩

海海溢江北岸崩公起隄自海門歷通泰北至鹽
城凡八百里又役人二十萬起高丘嘉定爲海運
表識名寶山上爲文樹碑山上旣開會通河罷
海運公建議造淺艦二千艘歲運二百萬石後增
至五百萬石疏清江浦引水由管家湖入鴨陳口
達淮就管家湖築隄亘十里以便引舟浚儀真瓜
洲通潮鑿呂梁百步二洪石平水勢開泰州白河
通大江築高郵湖隄隄內鑿渠亘四十里淮濱作
常盈倉五十區貯江南輸稅徐臨清德州皆建倉
便轉輸河淺處輒膠舟濱河置舍五百六十八所

舍置淺夫俾導舟可行處緣河隄鑿井樹木便人行獻陵初下詔求言陳七事其一言江南轉漕軍民並困上覽之戚然令有司議所以寬恤者仍勅獎公與世伯券景陵時鎮守淮安兼督漕運漕政益修上言楚王府密事請曲防調護衛軍漕上不從卒贈侯謚恭襄公閩爽英毅弘度偉畧稠人廣會談論亶亶公餘披閱載籍考知往古成敗治亂之故喜近逢掖士時相講議善交際能推利濟人所謂海運者本虞夏時沿江入海貢道自劉家港開洋經黑水綠水白蓬頭水諸大洋險又有

伏礁洄以故糧多漂至歲數萬石挽卒往往溺死自宋公開會通河罷海運瑄又治邦溝通江淮於是漕大利便并罷中灣之運漕渠在江淮間者公功爲大在齊魯間者宋公爲多公久祠清江浦漕渠旁往往有公祠至正德中始祀宋公濟寧分水河上宣德十年公子佐嗣卒子豫正統二年嗣十三年統兵討福建叛寇有功明年滅鄧茂七進流侯加祿百石景泰中兩鎮臨清卒贈黔國公謚莊敏子銳天順八年嗣出鎮兩廣勦蠻賊奪還俘掠萬人召總漕運十二年建白百餘䟽修治渠有功

加祿二百石歷進太傅卒子熊弘治十六年嗣正德三年總漕運劉瑾橫索熊金錢不得坐多買田宅侵民利謫戍海南衛奪誥券瑾誅復爵卒正德七年子壺優給卒無子熊姪圭嘉靖元年嗣

漳國鄭忠毅公

公名亨合肥人父用開國功陞副千戶大興衛公嗣以勇健持榜招胡幹難河陞指揮僉事密雲從靖難首擒馬宣克薊州南破雄漠攻真定先登援永平敗遼東兵克先鋒襲大寧夜率衆破鄭村壩上兵乘勝西破紫荆關掠廣昌直抵大同旋軍大

戰白溝河陷陣大捷逐北至雄又南出攻濟南再攻滄州絕餉道南驅至東昌戰敗西收散卒軍深州連戰夾河藁城並捷巡徼至河上還屯完遂破東平汶上長驅至齊眉山先鋒力戰戰靈璧大捷遂克泗州渡淮至江上入金川門歷陞都督僉事封武安侯食祿千五百石與世券永樂元年留守北京出鎮宣府繕諸屯堡八年總右哨從上出塞敗本雅失理十三年領中軍從出塞二十二年領左哨又從出塞還守大同獻陵即位克征西前將軍再鎮守大同防禦有方畧大同無虜患是時

邊將稱公及薛公祿宣德元年召還掌北京行後
府事未幾又出鎮大同轉餉宣府九年卒公嚴肅
謹厚善撫士庶潔耻掎克人不敢干撓卒贈漳國
公謚忠毅妾張自經殉贈淑人十年子能嗣坐法
立功邊塞正統六年復爵卒子宏十二年嗣卒子
英成化十三年嗣卒子綱正德十二年嗣

鄞國薛忠武公

公名祿初名貴膠人起卒伍從靖難奪九門東攻
薊南破雄漠圍真定擒駙馬李堅東援永平襲大
寧旋師解北平圍大戰白溝河又戰夾河滹沱河

先登有功單橋之戰馬蹶被擒奮脫縛拔刀斬守
兵數人復上馬去再戰大敗平安軍轉戰淮上有
功陞督府僉事從北征胡有功進右軍都督訓練
幼軍董建宮殿永樂十一年封陽武侯食祿千一
百石又再出從征胡獻陵即位巡北邊戰虜大松
嶺斬獲功多遣鴻臚卿即軍中勞賞與世券加祿
五百石洪熙元年克鎮朔大將軍巡邊景陵討高
煦以公宿將忠謹克先鋒圍樂安城擒高煦留鎮
樂安明年從上巡邊出會州戰敗虜塞下留鎮
薊州永平復克鎮朔大將軍護軍餉開平又出巡

邊戰虜鳳凰嶺斬其酋收孳畜數萬加太保條上
邊事城赤城永寧獨石疾作召還卒贈鄆國公謚
忠武公有勇畧善謀謀定後戰以故戰必勝紀律
嚴明秋毫無犯又潔廉善撫健兒同甘苦人樂爲
效力靖難諸將推河間東平二王及公三人爲最
子勲先卒宣德七年孫誥嗣與初祿千一百石卒
子琮正統五年優給景泰四年嗣卒子倫優給成
化十五年嗣卒子翰嘉靖九年嗣

鄆國宋忠順公

公名晟字景陽定遠人父朝用兄國興皆起定遠

田間累開國功朝用官至右都督國興總管戰沒
南臺公嗣兄官克徽寧征關陝三鎮涼州進官督
府洪武二十三年克總兵官征破哈密哈密者虜
所城也公誅其僞王子別列怯等三十餘人獲虜
衆千三百人金印一銀印二所得馬牛羊成給將
士又明年征罕東西番誅擒七千五百餘人獲馬
二千五百牛羊十萬班師二十七年調中府克副
總兵討遼東邊寇戰腦温江大捷明年平廣西峴
嶮諸寨又明年總羽林八軍平伍開龍里十三洞
三十一年率師城萬全諸衛還京建文元年以公

父居涼州著威信回番畏服克總兵官鎮河西靖
難後來朝進左都督克平羌將軍復鎮永樂三年
諭降虜酋把都帖木兒倫篤兒灰遣使持節即軍
中封西寧侯食祿千一百石世指揮使留鎮未幾
卒贈鄆國公謚忠順子瑄指揮使卒次琥尚安成
公主次瑛尚咸寧公主六年 上召大駙馬見武
英門諭兵部曰琥父有功可嗣侯與世券八年琥
出鎮河西輒遣人出塞 上切責琥令讀書改過
洪熙初坐不敬奪爵小駙馬嗣求白河墾地有司
言墾地有民田四十七頃景陵怒不與瑛河墾地

尋念琥功臣子又懿親與駙馬祿千石正統十四
年瑛戰沒北邊子傑以金吾指揮使嗣傑弟偉俊
皆指揮儼佐皆千戶傑卒景泰六年子誠嗣誠卒
無子天順二年弟讓嗣成化八年卒子愷嗣卒子
良臣正德十六年嗣

廣寧侯劉忠武公

公名榮宿遷人沿父名江為總旗旗例得沿祖名
以故公以江名為總旗從靖難立功夾河藁城肥
河陞督府僉事出塞討馬哈木阿魯台進左都督
克總兵守遼東當是時倭寇數入金復公設墩堡

伏兵永樂十七年倭船入王家山島傳烽至公率精兵疾馳入望海埭明日倭數千人分乘二十艘直抵馬雄島圍望海埭榮發伏出戰遣奇兵伏山下斷其歸路倭奔入櫻桃園公合圍斬首七百四十二捕生八百五十七自是倭大創迄今不敢犯遼東召封廣寧伯食祿千二百石與世券復名榮還鎮十八年卒贈侯謚忠武子湍嗣卒無子弟安嗣正統十四年從征降都督同知景泰中守大同詔復伯爵時上皇至大同安邀郭登出見郭曰虜不可測吾二人者守土為職脫有變柰社稷何

擐甲登城北面拜曰臣義與城存亡安竟出見命

進侯從上皇入京言官葉盛劾安落侯復為伯

天順元年進封侯加祿六百石與世侯券討曹賊

功加太子少傅成化七年卒贈嶧國公謚忠僖安

兄淮子瓘與安庶子璇爭嗣十二年瓘嗣伯與璇

錦衣正千戶十五年瓘卒無子安妻劉辭璇官乞

嗣父安侯安少子瑾又乞嗣祖伯爵十六年令璇

嗣伯以璇官與瑾弘治二年璇卒子佶嗣嘉靖元

年佶卒璇嫡孫泰嗣

論曰河間善謀東平善戰靖難之勲二王為最平

江開漕渠而罷海運至今賴之定興三出南交拓地千里武安陽武往來北塞下且戰且守忠順靖羗於西垂廣寧伏倭於東徼所謂經營四方矯矯虎臣與

皇明名臣記第五卷終

子履準校正

皇明名臣記第六卷

吾學編第二十七

海鹽鄭曉

太師楊文貞公

公名士奇初名遇以字行江西泰和人早孤從母敦敏力學手不釋卷年十三通舉業爲鄉里師有隙生攜書數冊過館下色悽甚公問故云有母不能養也公曰嗟乎人孰無母亟分徒十五與生弱冠游章貢章貢守儒者重公令攝琴江教事琴江令亦儒者重公公道令平恕邑有寃囚公爲言令得解囚懷金謝公曰吾以教爲職縣官事吾安所

預聞辭不受已而游楚中楚中人皆慕公諸楚中
吏欲薦公輒辭建文初廷臣薦公名儒徵授教職
時年三十六未任會修 高帝實錄留翰林克編
纂官尋命吏部考第史館諸儒尚書張統奏公第
一除吳府審理副明日復召入翰林靖難後改編
修入直文淵閣陞侍讀公有經濟才廉靜寡慾文
學蘊藉 上顧喜公永樂二年兼左中允饒人朱
季友獻所著書詆宋儒公請燬季友書上勅行人
錮季友至饒大會藩臬郡縣吏民撻季友盡燬其
家所著書五年陞諭德六年 上巡北京留輔太

子監國 上問監國事公頓首言太子孝敬仁明
每侍學輒言尊君順親忠孝天性太子每注意傾
聽十一年請罷明年元旦朝賀以日食故十二年
秋 上北征還下公錦衣衛頌繫尋宥之十四年
上 在北京聞漢庶人有異志召問隆平侯信還
京又問公頓首乞善處父子兄弟間全大恩 上
默然削庶人兩護衛是年上歷代名臣奏議十五
年東宮令公爲周易直指置齋閣中二十年秋
上北征還又下公錦衣衛頌繫逾旬釋公事長陵
父歷陞翰林學士改左春坊大學士二十二年太

子即位始陞禮部左侍郎兼華蓋殿大學士入謝
首言北京山東賦棘歲八十萬爲香炭得無與寬
詔戾 上立減十五 上曰朕倚任義原吉士奇
宜盡言臣朕公每與兵部尚書李慶禮部尚書呂
震議事不協 上輒從公言憐公孤立又曲爲調
劑和輯諸大臣洪熙元年加少保兵部尚書三俸
並給辭尚書俸賜天元玉曆賦尋加少傅一日
上出章示諸大臣言海內治平者公對曰流徙未
歸瘡痍未復人尚艱食願 聖明留意 上曰曩
與卿輩繩愆糾繆銀章惟士奇封入伍䟽豈朝政

無闕生民果安乎諸大臣皆頓首謝 上即位以
來大理少卿戈謙數言事免謙朝群臣恐懼久之
無敢復言事者公爲謙解召謙爲副都御史大理
卿虞謙亦以直言左遷少卿而以其屬吏楊時習
爲卿公又力言不可是年四月蹇夏東陽及公侍
上問昨夜星變見否對曰未見 上慘然曰天命
也嘆息而起又明日召公及蹇公論曰朕監國二
十年讒慝交構心之艱危吾三人共之賴 皇考
仁明得保全言已泣二人亦流涕慰 上上曰即
吾不幸後誰復知吾三人同心一誠遂賜公楊貞

一印閱月 上崩景陵即位公首定南北取士法
會試南十六北十四宣德初漢庶人反 上親征
擒庶人師還陳山迎上乞移師彰德襲趙王 上
令諸大臣議未決公不可比至京 上思公言召
賜金幣二年安南反黎利矯陳氏有孫暲在乞立
暲 上密示張輔輔曰此利譎詞當益發兵誅此
賊輔退又召問蹇夏皆對曰利不可信蹇夏退又
召諭公及東陽曰輔義原吉云云二公力言棄交
趾便 上喜賜二人飲明日出利表示廷臣遂赦
交趾三年斥都御史劉觀 上諭朝臣貪濁柰何

公對曰貪風始永樂末今更甚 上問何如對曰
十五六年後文皇數疾不視朝扈從之臣請託賄
賂公行無忌 仁宗嘗諭臣初至北京 上言諸
從臣惟吏部侍郎師達庶東陽曰當是時惟方賓
有貪名 上即顧東陽問今日貪者誰甚對曰莫
甚劉觀 上撫掌嘆曰除惡務本觀去誰代觀者
公薦顧佐五年春 上御齋宮召議赦即授竿牘
曰蠲災傷田租第一事詔下民大悅是歲清明
上奉太后謂二陵召見公及張輔蹇東陽金南楊
六臣 太后曰卿等先朝舊臣勉輔嗣君 太后

退謂上曰先帝曩在宮時議六臣優劣輔武臣達
大義重厚小心但多思少斷士奇能持正不避忤
意每議事先帝數不樂後竟從士奇言是夏 上
立文華門召公屏左右言張瑛嘗言榮畜馬甚富
今察之皆邊將饋榮榮大負朕對曰榮屢從文皇
北征典兵馬以故接諸將今內閣臣知邊將才否
塞阨險易遠近及虜情順逆臣等皆不及榮遠甚
上 笑曰朕初即位榮數短汝非義原吉汝去內
閣父矣汝顧爲榮地耶頓首曰願 陛下以曲容
臣者容榮使改過六年秋 上頗微行夜半從四

騎至公家比出迎 上已入門立庭中公悚懼伏
地言 陛下柰何以宗廟社稷之身自輕擾擾塵
埃昏昧中 上笑曰思一見卿明旦遣太監弘問
曷不謝對曰至尊夜出愚臣迨今中心惴慄未已
豈敢言謝又數日遣弘問堯不微行乎對曰 陛
下恩澤豈能遍洽幽隱萬一有冤夫怨卒窺伺竊
發誠不可無慮後旬餘錦衣獲二盜嘗殺人捕急
遂私約候駕之玉泉寺挾弓矢伏道傍林莽中作
亂捕盜校尉變服如盜入盜群盜不疑以謀告遂
爲所獲 上歎曰士奇言不虛遣弘賜金綺七年

乞方面郡守聽三品以上京官及布政按察使薦
用犯賊連坐又乞極刑之家有賢子弟勿棄上
皆從之上又曰劉翀亦極刑家今不在侍近乎十
年裕陵即位冲年昭皇后臨朝委任公公乞屯田
以省漕運又乞開經筵選簡侍從加少師正統四
年乞致仕不允與璽書展墓過歸數年間災變頻
仍每切修省蠲逋慎獄休養生民又能嚴覈百司
推薦才傑公卿藩臬頗稱得人 上亦高拱九重
不事巡幸南北供億十減三四奄振上畏母后下
憚公雖欲侵權稍自斂戢七年昭皇后崩又明年

公卒年八十贈太師謚文貞公預修四朝實錄
太祖實錄凡三修初建文時王景總裁永樂初解
縉再修公也公所著有沙羨稿石臺稿文籍志法
書志東里集三朝聖諭錄

太師楊文敏公

公初名子榮字勉仁閩建安人建文二年進士爲
翰林編修靖難後召七臣入內閣公年最少最警
敏 上爲更名榮 上嘗晚出右順門召內閣惟
公在出江西撫賊章曰都督韓觀宜有勞勅公讀
章曰計發奏時觀在途觀不得論功 上從公言

當是時內難初平危疑未戢公內承顧問外酬政務稽纂文事日無虛晷進修譔數月陞侍講永樂元年歸省二年七人侍上勞曰天下事朕與若等相商確非若六卿分理並賜三品服立太子兼諭德尋轉庶子分直講經史五年經畧甘肅邊外艱起復俄內艱會北巡又起復七年公及胡廣金幼孜扈行甘肅總兵官何福言虜脫脫不花來歸公復至甘肅受降還復命公持節至亦集乃軍中封福寧遠侯上寧夏邊務八年春從征本雅失理至驢駒河九年春始得奔母喪中使護行比還

侍學 皇孫十年守臣宋琥言老的罕叛數入赤

斤蒙古寇 上以公曉暢軍旅命公至陝西會豐

城侯彬議進兵方畧是冬還言出嘉峪關千里險阨乏水草餉道弗能通又沍寒士馬疲瘠不可輒用兵罷中國彼小醜當自來歸 上從公言未幾

老的罕復歸十一年從巡北京明年從征瓦剌時皇長孫侍行 上令公三人暇即侍 長孫講析

治理十四年陞翰林學士兼庶子十五年從巡北京十六年掌院事 上益信任公公抗直或發人私以故人亦忌公薦公為祭酒國子踈公不得近

在左右 上憐公才不許公知諸大臣忌已幸
上不信益發府部院拾弊爲密章上 上亦留
中不下務輯和諸大臣十八年進文淵閣大學士
仍兼翰林學士從北征秋還京冬又將西征或言
建文中梁江西民兵可徵發 上持章示公對曰
皇上命復民業且二十年復征非信動衆非仁料
兵非勇 上曰善三幾灾偕切致上便宜拾事二
十一年秋從西征駐宣府軍中事一切付公是後
也也先土下來歸衆疑懼莫敢定議公請往受降
二十二年從北征中道乏軍興公請令軍中相假

貸入塞官償詠班師浙江守臣言浙東鰥水與閩
政和山寇掠劫請兩都司合兵進勦公曰不可愚
民苦有司不得已相聚勦則毒民益聚不可解願
下勅遣一介撫諭不足煩兵上從之侍 上坐帳
殿 上曰東宮監國久政務熟閑今歸付天下事
東宮朕將老焉公曰 太子孝友天下歸心稱
皇上付託 上悅至榆木川大漸時 太子在南
京公私不發喪斂畢馳告 太子太子至即位陞
太常卿仍兼大學士逾月進太子少傅謹身殿大
學士已而 上知公軍中倉卒有大功陞工部尚

書支三俸明年獻陵崩 太子又去南京防奸豫
變兩京戒嚴公急迎 太子入即位復公家宣德
元年漢庶人反公力贊親征選揀將卒及軍中進
止從公策馬騏亂交趾黎利以立陳氏爲名據地
反大臣皆言發兵滅此賊公及西楊請棄交趾畀
陳氏是年秋從 上出喜峯塞召公問曰人君馭
世之權孰重對曰命德討罪 上曰然二者天下
公器舜舉十六相誅四凶而天下服以天下之好
惡爲好惡也齊威王烹阿封即墨大夫不以左右
之好惡爲好惡也人君賞罰至公無私然後能服

天下公類首稱善選陞少傅賜剛直方正銀章對
月 上念蹇夏西楊及公四人老賜勅褒論公又
再侍巡邊皆至洗馬林班師裕陵即位與西楊並
進少師正統五年展墓還至武林卒年七十贈太
師謚文敏授世都指揮使建寧公總裁四朝實錄
經理三帝山陵累從出塞屢受遺音撫順討逆羈
勒萬里運籌設險折獄理財隨機應變靖重不撓
濟險解紛調停有術果而能容謀而善斷內行修
謹曾度圓融祿厚財豐贍賑窮阨貴賤賢愚皆歸
心焉所著有北征記默庵退思二集靜軒雲山二

稿訓子編兩京類稿

太師楊文定公

公名溥字弘濟楚石首人建文二年進士爲翰林編修靖難後侍東宮爲洗馬兼編修東宮觀漢書稱張釋之對曰釋之誠賢非文帝寬仁亦未得行其志因采文帝事編類以獻東宮大悅時二王巧中東宮宮寮多得罪永樂十二年東宮遣使迎

上遲上怒黃淮先至下獄西楊金問繼至上曰且宥士奇問何人乃得侍太子下法司訊詞連公及芮善王愷遂與工部侍郎陳壽俱下詔獄

公在獄中勵志讀書不輟獄中人止公命巨測無徒勞苦爲應曰朝聞道夕可死奈何輒自棄經史諸子讀數周長陵崩獻陵釋夏公即釋公公出獄哭文皇伏地不能起上亦哭陞公翰林學士

宣德元年陞太常卿兼學士入內閣是年獻陵崩先是獻陵欲近公建弘文閣思善門左命公掌閣事又選侍講王璉侍直改博士陳繼學錄楊敬爲編修訓導何澄爲給事中輪對上手弘文閣印授公曰朕用卿左右非止助益學問亦欲廣知民事爲理道助即有建白封識以進公嘗密疏言事

上 襄答至是 上還弘文閣印宣德元年 上
召公語及治兵公曰兵貴訓練有方撫養得宜
上曰養之厚則得其心練之精則得其用若素不
訓養一旦驅之矢石間進退失措安望有濟三年
扈 上出喜峰口征虜四年 上坐齋宮召諭曰
朕每念創業難守成不易夙夜惓惓今幸百姓稍
安顧禍亂生于不虞嘗爲憂惕邇來群臣好進諛
詞令人厭聞卿宜勉輔朕公頓首謝臣不敢忘報
稱 上曰直箴朕過報朕多矣公又頓首謝直言
求之非難受之爲難 上曰然是年秋內艱遣中

官護行賜葬母一品夫人禮遂 召公復入弘文閣
是冬從巡塞上度鷄鳴山六年冬 上坐文華殿
三揚並侍 上諭曰朕念祖宗積德累善篤生
太祖繼天立極創業垂統 太宗迅掃姦回再安
宗社 皇考恢弘治化增高累厚以固鴻業朕承
天位夙夜不忘記曰先祖有美而不知不明知而
不傳不仁是用撰述成詩揭之座上朝夕覽觀勉
圖繼述庶幾永保天命今以列本賜卿等當亦思
祖宗開創之難守成不易盡心輔朕國家安卿等
亦與有榮焉尋陞禮部尚書兼學士裕陵即位

昭皇后臨朝公復入內閣首言聖帝明王莫不務學先帝在時屢諭臣等勸學東宮遺音尚在靈鑒如臨皇上肇登寶位必明堯舜之道以圖唐虞之治乞早開經筵預堦講官必得學識平正言行端謹老成重厚達大體者數人以共其職及選宮中左右朝夕侍從之人涵養本源輔成德性昭皇后喜一日后坐便殿上西向立后傍召三楊及國公輔尚書淡諭曰卿等老臣嗣君冲年幸并力同心共安社稷又召公前諭曰先帝每念卿忠屢形愁嘆不謂今日復得見卿公伏地泣

昭 皇后亦泣左右皆悲梅口先是永樂中 上嘗

巡北京 太子居守以讒故宮寮大臣輒下詔

陳壽解縉馬京徐善述王汝玉梁潛周冕相繼死

獄中公及黃淮一繫十年瀕死者數矣獻陵每與

后言及東宮時事慘然泣下以故 昭皇后為言

后又顧 上曰此五臣三朝簡任伴輔後人皇帝

萬機宜與五臣共計正統四年 宣宗實錄成進

少保兼武英殿大學士公夙稟淳實操性直剛不

尚機警每崇忠厚至議政決疑與諸大臣爭可否

或有躁心浮氣公能舍已從人畧無係吝時稱三

楊學士文貞為西楊文敏東楊公南楊正統五年東楊卒又明年昭皇后崩又明年西楊卒十一年公卒十四年遂有土木之禍公卒年七十五贈太師謚文定

論曰西楊玉質金相通達國臨東楊揮斤游刃遇事立斷南楊安貞復節調羹而醴而參合成名並稱賢相云余聞之先人曰文貞輔導監國危心慮忠卒能保其身以濟其主文敏經畧北塞金湯萬里有武績焉文定中更險難比入內閣遲二楊者二十三年復還弘文再入內閣昭皇后臨朝與民

休息四海宴然皆其力也

皇明名臣記第七卷

吾學編第二六

海鹽鄭曉

太師蹇忠定公

公名義字宜之初名瑤巴人洪武十八年進士授
中書舍人奏事稱旨一日上顧公問汝蹇叔後
乎頓首謝不敢上喜卽書義字賜公易名一考
當調命滿九載朕且用義建文君即位知太祖
欲用公超陞吏部右侍郎靖難後轉左逾月陞尚
書代張統當是時盡改建文諸例復洪武之舊公
從容爲上言鑿成憲者豈無因革及亂政者自

有經權間舉數事陳說本末 上喜公忠實從其
言或遂譖公不忘建文君 上不聽永樂二年兼
詹事 上欲諭太子率令詹事往導意太子尤愛
重公七年巡北京佐太子監國諸王及遠夷奏請
詣行在所餘悉啓太子處分公熟於典故達政體
不動聲色事賴以濟九年與夏公同滿考賜宴勅
獎論十七年父喪歸起復詣北京謝遣中官護還
京明年從太子朝北京十九年三殿災特勅廷臣
二十六人巡行天下公及給事中馬俊巡應天諸
郡問民疾苦考察陟斥文武吏公言國家多事時

盡法繩吏人將不勝斥出太甚者數人還吏部二
十年 上北征還坐東宮事與西楊頌繫錦衣衛
尋釋獻陵即位預政議者四五大臣首進公少保
兼尚書支二俸歷進少傅少師賜公及東西楊公
金公夏公繩愆糾繆銀圖書各一諭曰朕有過舉
卿卽具疏用此封識進內制呈五臣及黃文簡公
誥草 上特增二語曰勿謂崇高而難入勿以有
所從違而或怠又面諭曰此朕實心未幾又制蹇
忠貞卽賜公公重厚不敢專斷每承顧問常持兩
端不能決然忠實無他腸西楊謂公勿過息公應

曰事不熟慮有後患 上嘗笑曰義士奇言皆是
東楊或詆公語聞 上上不直東楊公頓首言榮
無他即左右有讒榮者願 皇上慎察 上笑曰
吾亦不信偶言及耳宣德初從征漢庶人軍中進
止多從公時議赦交趾公及夏公力言 祖宗疆
土不可棄 上不聽命擇人使交趾公薦伏伯安
西楊語夏公伯安不可使公當榻前力爭當是時
上 尤信任夏公比召諸大臣入議公薦伯安
上顧原吉云何對曰不可公曰伯安有口才群臣
不及 上又顧問士奇云何對曰伯安有穢行無

學識遣使必辱國 上從二人言不遣伯安使公
亦不以二人爲異已宣德三年秋從巡邊還 上
顧蹇少師老不欲煩以事勅曰卿事 祖宗積效
勤誠朕嗣統尤資贊輔夙夜在念圖善始終以卿
春秋高尚典劇司非所以優老待賢况師保寅亮
爲繼不煩庶政乃副倚毘可輒吏部務朝夕在朕
左右相與討論至理共寧邦家其專精神審思慮
益致嘉猷用稱眷倚老成之意明年夏郭進代公
尚書又賜公忠厚寬弘銀章一十七年秋令有司治
公第八年一品九年賜宴禮部公生日賜鈔萬馬

一裕陵即位日公齋宿得疾越五日卒年七十三
贈太師謚忠定公孝友質實和厚簡靜處人有量
未嘗一語傷物至議典法不苟爲包含必歸於正
歷事六朝凡五十年貴而能謙富而能約 上前
所言未嘗退以語人在吏部尤慎擇郡守考察明
恕不苛不縱公子英筮皆尚寶司丞長陵即位之
歲至成化丁亥凡六十六年吏部尚書四人公及
郭公兩王公而何公協佐者不與焉自後至正德
終五十四年凡更十八人而尹公最久十四年

太師夏忠靖公

公名原吉字維喆湘陰人鄉薦遊太學選入禁廡
書誥授戶部主事尚書郁新奇之與商確諸司事
劉郎中者忌公會劾諸司怠事者 上曰宥之新
請必罪 上怒新問誰教汝新免冠謝得已劉郎
中因奏果人教尚書者意中公 上問新爲誰對
曰堂後書算生教臣臣愚過聽萬死 上下書算
生獄劉郎中又奏公專尚書柄言前事實原吉教
尚書 上曰聞原吉能佐尚書汝顧欲陷原吉耶
劉郎中與書算生皆棄市建文君即位逾月陞戶
部右侍郎明年克採訪使巡福建未幾移鎮蘄州

靖難後轉左或言公建文用事人不宜大用上
曰原吉忠於太祖以故忠於建文又豈不朕忠
耶逾月進尚書永樂元年吳浙大水公行視水遣
僉都御史俞士吉賜公水利集累遣侍郎李文郁
大理少卿袁復陝西叅政宋性佐公公言浙西諸
郡蘇松最居下流常湖嘉三郡土田高多下少環
以太湖綿五百里納杭湖宣歙諸山水注潑山諸
湖入三泖頃浦港湮塞匯流漲溢傷害苗稼拯治
之法宜浚吳松諸浦港泄其壅淤以入於海吳松
江袤二百餘里廣百五十餘丈西接太湖東通海

前代屢疏以當潮汐沙泥淤積旋疏旋塞自吳江
長橋至下界浦約百二十餘里雖稍通流多有淺
窄又自下界浦抵上海南倉浦口可百三十餘里
潮汐壅障芟蘆叢生已成平陸欲即開浚工費浩
大且灑沙淤泥浮泛動盪難以施工臣等相視得
嘉定劉家港即古婁江徑通大海常熟白茆港徑
入大江皆廣川浚流宜疏吳松江南北兩岸安定
等浦港引太湖諸水入劉家白茆二港使直注海
松江大黃浦乃通吳松要道下流壅塞難即疏浚
傍有范家浜至南倉浦口可徑達海宜浚令深闊

上接大黃浦以達涿湖之水此即禹貢三江入海之跡俟既開通相度地勢各置石閘以時啓閉每歲水涸時修圩岸以禦暴流 上從之後夫凡十餘萬公布衣徒步日夜經畫盛暑揮蓋去日衆赤體暴日中吾何忍歲饑奏發粟三十萬石賑濟二年還朝復出治水水洩農田大利召還部特賞功封建征夷下番營北京費億萬計皆取辦于公從上 北巡兼掌行在吏禮兵部都察院事八年上北征輔太孫留守北京總理行在九卿事諭曰朕以房玄齡視卿公旦入朝獨近宸前參決機務

朝退郎官御史環請事公口應手判不動聲色駕還扈還京尋命侍太孫周行鄉落取蠶黍進太孫曰願歿下味此知民艱苦九年滿考宴便殿諭廷臣曰原吉 高皇養成賢德欲觀古名臣此其人矣命與姪廣孝監修國史十一年扈北巡侍太孫居上營後十四年侍太孫還南京十五年從幸北京十八年宮殿成命召太子太孫于南京十九年三殿災詔求直言言者輒云都北京不便主事蕭儀言尤峻 上怒殺儀曰吾與大臣密議數月言遷都便言官遂劾諸大臣 上跪言官大臣午門

難遷都利害都御史陳瑛罵言官白面書生不知
大計 上令左右問衆議云何公曰臺諫職言路
且應詔陳言臣等備員大臣不能協贊大議臣等
萬死罪再問對如初 上說盡釋言官大臣 上
御便殿闕門每召公語移時左右莫得聞退則恂
恂若無預者交趾平 上問陞賞孰便對曰賞費
于一時有限陞費於後日無窮 上從之法王來
朝 上欲郊勞公以爲不可法王見便殿命公拜
又不肯拜 上笑曰卿欲效韓愈耶過侍郎楊勉
之遠矣十九年 上議征虜公力諫 上怒繫內

官監籍其家竟北征阿魯合及兀良哈明年又征
阿魯合又明年北征還至榆木川不豫顧左右曰
原吉愛我 上訃至太子走公繫所呼公哭曰楊
榮至父皇賓天矣公伏地哭不能起太子召問國
事公言方今民力竭于東南戎伍疲于漕運宜幸
南京少蘇民困太子即位復公戶部尚書會母喪
乞終制 上曰卿老臣宜共濟艱難卿有母我無
父乎如卿辭職朕亦不當在此不允立太子兼太
子少傅尋進少保兼太子少傅尚書如故支三俸
固辭許辭太子少傅俸洪熙元年冬無雪 上作

憂民吟授公和手勅欲除鬻割鞭背連坐妖言誹
謗之刑公與二三大臣密議聞 上從之賜田五
頃建第兩京李時勉廷諍激 上大怒言時勉當
朝辱朕公曰時勉小臣豈能損聖德願少霽天威
下法司議罪未晚太子去南京 上崩 昭皇后
命公急迎太子太子將至群臣郊迎 后留公佐
襄王居守太子既即位時時密咨公或袖小帖付
公公亦時有所白宣德元年漢庶人反指公徵赦
租爲奸臣首 上夜召諸大臣議公免冠頓首曰
臣罪當死 上曰彼借卿爲兵端耳命坐屏左右

密議東楊首勸親征 上難之顧公對曰往事可

鑒臣見所遣將語臣兵事輒泣臨事可知兵貴神
速卷甲趨之所謂先人有奪人之心也榮言是

上意遂決師臨城庶人猶令人繞城罵公三年賜
範金銀印曰含弘貞靖曰謙謙齋曰後天下樂從
巡邊還 上念公老勅輟部務俾專論道左右明
年夏召郭資代公是冬從閱武郊外公生日 上
繪壽星圖爲詩賜公五年春卒贈太師謚忠靖復
其家朝議公宜贈伯西楊不可後三年郭資卒得
贈湯陰伯公天性寬平靡德不報靡怨不釋其畫

財賦以愛人節用爲先酌大體畧煩苛以故雖數
與大役供餉贍給而民不繹騷雖惴惴無矯節不
務悅人人無識不識皆謂公君子長者呂震嘗
上前短公柔奸震爲子求官 上問公公稱震有
守城功陳瑄靖難初欲殺公公力薦瑄才總漕運
周忱爲長史或薦爲郡守公言郡守不足展其才
忱得陞侍郎巡撫當是時蹇夏齊名蹇公簡重善
謀夏公弘裕善斷靖難後外蕪臺省內叅館閣吁
俞可否期于濟國三十年間民安吏治有古大臣
之風焉公監修 太祖 成祖 仁宗三朝實錄

太祖實錄凡三修建文中徐輝祖監修永樂初李
景隆監修再公監修解學士表永樂初修者元年
六月上凡一百八十二卷公再修者十六年五月
上凡二百五十七卷又寶訓十五卷公治水東南
有功吳人尸祝之正統間豪勢家奪水利溝防盡
壞周文襄公治之纔十餘年又壞景泰中李侍郎
敏治之弘治中又壞徐侍郎貫又治之正德末又
壞李尚書克嗣又治之

太保黃忠宣公

公名福字如錫昌邑人鄉貢士爲項城主簿改清

源有惠政遷金吾前衛知事陞龍江衛經歷蚤暮
勤職才識明敏數出奇見任上官洪武中上書論
大計上奇公三十一年四月超陞工部右侍郎
建文君特見信用靖難後李景隆指公爲齊黃黨
公厲聲言臣罪固應死但目爲姦黨則臣心未服
上不問復其官尋轉左逾月陞尚書永樂三年
都御史陳瑛劾公不恤工匠改北京行部尚書四
年征交趾公及大理卿陳洽轉軍餉旣郡縣交趾
公以尚書兼掌布按二司事公視民如子勞來安
輯躬勤不倦又戒郡邑吏專意撫字曰新造之邦

新附之民政令條畫並寬簡中朝士遷謫至者咸
見溫恤問疾周貧禮賢雪罪兵民感悅夷蠻欣附
中官馬騏怙恩肆虐公數裁抑騏誣公有異志
上察其妄曰此君子不容於小人不問獻陵即
位召還曰卿老成人久勞於外朕亟欲見卿公在
交趾凡十九年及還交人扶攜走送號泣不忍別
宣德元年騏激交趾反時洽以兵部尚書代公累
奏乞公還撫交人會公持節出封親藩即日召還
勅曰卿遺愛在交交人思卿卿強爲朕再行昔
先帝念卿萬里召還輔朕朕亦不欲遠卿顧遐方

新附終始勞卿安輯以工部尚書兼詹事出領交趾藩臬事比至柳總兵敗死公亦被賊執賊驚下拜曰公不北歸我曹不至此饋白金餼糧肩輿衛送出境至龍州公盡取賊遺歸官還京爲行在工部尚書四年與平江伯計漕事五年公請於濟寧以北衛輝真定以南近河地役軍民十萬人屯田積穀省漕粟下行在戶兵部議郭資張本言緣河屯田便鳳陽淮安以北及山東河南北直隸近河二百里內通舟楫處擇荒閒田以五萬頃爲率發附近軍民五萬人耕給官牛農器但山東近年旱

饑流徙初復衛卒多有役宜先遣官行視田俟開墾上從之遣吏部郎中等官趙新劉澤榮華張琰吳政等經理屯田公總其事既而有言軍民各有常業若復分田役益勞擾事竟不行七年上宮中覽公言漕事便宜喜公有經畧恤民隱出其章示西楊曰福言智慮深遠可行六卿中誰倫對曰福受知太祖最先大用正直明果一志國家生民今六卿中鮮及福者永樂初建北京行部命之綏輯凋瘵及得交趾命總藩憲安新附具有成績才德兼備有大臣體諸卿誠不及福今年七十

矣諸後進少年高坐公堂理政事享安佚出入輿馬騶從揚揚福四朝舊人乃朝暮奔走道路勞瘁不已殆非國家所以優老敬賢之道 上曰非汝不聞此言西楊曰南京根本重地 先帝以儲宮監國今宜用福南京福老成忠直緩急可倚 上曰然明日遂命吏部改公南京戶部尚書明年兼掌南京兵部當時諸大臣多依違承順公持正不阿以故去南京裕陵即位加少保叅贊機務留都有文臣叅贊機務自公始公每事先籌定付襄城伯襄城伯亦敬信公比視事皆襄城伯處分公不出 一語或以爲言公曰體當如是且汝見守備何嘗一事錯時以公議復設提學憲臣正統五年卒成化初贈太保謚忠宣公秉心正大義利介然天下士大夫無論識不識皆知其爲君子斥姦闢諛無所顧忌憂國忘家老而彌篤俸賜分贍族姻屬纒之日室無百緡

太子太師胡忠安公

公名濙字源潔武進人建文二年進士爲兵科給事中永樂元年陞都給事中戶科時傳建文君崩或云遜去諸舊臣多從建文君去者 上益疑大

戮建文君諸臣遣公巡天下名訪張儼偁又名頌
書徧行郡縣察人心及建文君安在時又傳建文
君在滇南公以故在楚湖南最久十四年內艱起
為禮部右侍郎明年巡江浙二十一年巡均襄還
朝會 上駐宣府公馳夜上謁 上已就寢聞公
至被衣急起召入勞公賜坐與語公言不足慮也
先公未至傳言建文君蹈海去 上分遣內臣鄭
和數輩浮海下西洋至是 上疑始釋太子監國
藩王謀奪適造飛語 上命公往察密疏聞公具
述監國七事言太子誠敬孝謹無他太子即位轉

太子賓客兼祭酒南京未幾闕宮中密疏見所述
七事大喜謂公忠慎朕不及知也俄崩景陵即位
復召為侍郎禮部兼太子賓客會公來朝留行在
禮部宣德元年進尚書二年賜第給闈三年賜文
恭世家清和恭靖二銀章是秋扈駕出會州明年
夏再扈巡邊沒常豪人田宅盡賜公尋兼詹事六
年兼領行在戶部事公有才猷深厚不洩禮典財
賦經畫有章國家大議與諸閣老相可否必執正
論景陵嘗曲宴公及西楊蹇夏曰海內無虞四卿
力也裕陵即位益禮敬公元年失行在禮部印自

効 上不問改給行禮部印九年疏引年不允十
四年北征留守京師廷議迎 上皇時王文厲色
曰孰謂虜可和彼不索金帛且索土地憂方大耳
衆相顧不敢言于少保徐曰防變方畧我與總戎
責也俄旅退賴公有定執竟上奉迎儀注景泰元
年楊善使虜濙言 上皇蒙塵已久宜即附善等
進上服食不報又請明年正旦朝 上皇於延安
門不許二年災異乞歸不允三年以太子太傅加
少傅懷獻太子立進兼太子太師是年十一月己
巳 上皇萬壽節公乞令百官拜賀於延安門不

許六月疾作又明年 上皇復位力疾入一見許
老去遣子長寧來謝 上念公疏屢請令百官朝
延安門忠悃授長寧官錦衣世鎮撫卒年八十九
謚忠安公平易寬和廉靖寡慾自奉薄簡與居有
常立朝幾六十年十知禮部貢舉未嘗疾言遽色
人皆知爲君子長者

尚書周文襄公

公名忱字恂如吉水人永樂二年進士時簡進士
二十八人進學文淵閣公乞預 上喜公有志改
翰林庶吉士十年授刑部主事陞員外郎盡心簡

續二十二年爲越府右長史宣德五年東南財賦
煩敝廷薦陞工部右侍郎巡撫江南直隸公辭越
靖王至江南召父老問利病興革滿九年轉左正
統六年兼巡撫嘉湖二府十四年八月陞戶部尚
書改工部仍巡撫景泰元年引年不允明年請老
召還京致仕又明年卒凡江南巡撫二十二年先
是胡槩巡撫江南用法嚴刻公濟之以寬凡告訐
輒不省或面詰公不及胡卿使我下情不能上達
公笑應曰胡卿勅有祛除民害語我勅但云撫安
軍民朝廷委任自異耳當是時蘇州府逋稅七百

九十萬石常松亦然公閱牒大異詢父老皆伏地
哭言蘇吳豪富有力者不出耗并賦之貧民貧民
不能支盡流徙公創爲平米官田民田並加耗蘇
稅額二百九十餘萬石公與知府况鍾曲算疏減
八十餘萬舊例不得團局收糧公令縣立便民倉
水次每鄉圖里推富有力一人名糧長收鄉圖里
人夏秋兩稅加耗不得過十一又於糧長中差力
產厚薄爲押運視遠近然逸爲上下酌量支撥京
通正木一五支三臨清淮安南京等倉以次定支
爲無一圖剝補諸費填出銷入支撥羨餘各存積縣

倉號餘米米有餘減耗次年十六徵又次年十五
更有羨縣爲倉名預備備水旱不時賑貸及農乏
食綱運風漂盜奪者國服轉假至秋抵斗還官其
修圩築岸開河濬湖人支口糧以爲農事故不責
償時插時農借貸必驗中下事力及田多寡給之
秋與糧并賦凶歲再賑秋熟不償者來歲不復給
時裏河漕軍與民半軍船出官廠民率雇舟又經
年往復失農業公與平江伯議奏軍民舟至淮安
或瓜洲水次交兌江北衛所漕者出通關還繳淮
安一石兌加五斗瓜洲五升如裏河舟未渡江南

諸衛抵倉兌者加與過江米及攬墊蘆蓆與折
米民間馬草歲運兩京勞費不貲公請通州草場
立官庫每束折銀三分千束銀止三十兩南京輕
齎赴買上北京文武職官俸糧皆支南京米賤時
銀一兩得米七八石公請江南重額官田極貧下
戶兩稅准折納金花銀銀一兩准米四石解京折
支京官俸蘇有官布足准糧一石舊例足重三觔
比解又以紗麤十退八九公言農間布足觔重紗
麤價顧賤紗細布輕價益高不拘觔重務在長闊
如式耳傳中馬衣被諸應客者舊皆領於馬頭馬

頭豪者橫科弱者粥產公令田畝收米升九合與
糧俱征驗馬上中下價直給米正統初淮揚災鹽
課虧公巡視奏令蘇州等府撥剩餘米縣撥一二
萬石運貯揚州鹽場准爲縣明年田租聽竈戶上
私鹽給米時米貴鹽賤官得積鹽民得食米公私
大濟綵繪宮殿計用牛膠萬餘觔遣官勅公上供
甚急會公議事赴京遇諸塗勅使速公且還治公
不應至京言京庫貯牛皮歲久朽腐請出煎膠歸
出餘米市皮還庫十四年邊事急工部索兵仗數
百萬計公出餘米造上明盔者須水磨非遲歲月

不可公令且沃錫旬日畢辦正統六年至海鹽築
捍海塘令郡七縣合役萬夫自七年正月至十一
年費萬計皆出公度支海竟不能爲患每遇凶荒
輒便宜從事補以餘米賦外更無科率凡百上供
及廨舍學校賢祠古墓橋梁道路溝渠修葺一切
取給餘米歲不下萬計施給僧道問報饋遺往往
不吝各得其歡心江南之人愛戴如父母沒而尸
祝至今思周尚書也公守量恢弘才識通敏蒞事
精勤臨民和易有善謀者雖卑官賤吏破去崖岸
開心訪納性尤機警籌畫諸郡錢穀鉅萬一屈指

無遺算嘗為冊曆記日所行事及陰晴風雨有告報輒按據詰訊人莫能欺每出會計視地豐凶事緩急為弛張調劑變通民無逋負官有餘積前後理財者皆不能及卒年七十三謚文襄論曰忠定秉銓忠靖握利權皆二十七年忠宣尚書兩京三十九年而在交南者十有九年忠安為禮部尚書三十二年文襄巡撫江南二十二年皆久任責成以故用人理財禮樂征伐諸大政事文經武緯各盡其長章程故在後鮮能及焉

皇明名臣記第七卷終

子履準校正

皇明名臣記第八卷

吾學編第二十九

海鹽鄭曉

左春坊大學士解公

公名縉字縉紳吉水人洪武二十一年進士選中書庶吉士大庖西上封事論時政剴切萬言其畧曰陛下挺生南服一統華夷功高萬古既無女寵外戚寺人藩鎮之患又無貨利聲色遊畋玩好之欲既皆遠過於漢宋又何遜讓于唐虞惟願陛下以天地為一體以天下為一人令出惟行也不宜於數改刑期于無刑也寧失於不經故令數改

則民疑疑則不信刑太繁則民玩玩則不清立國
至今將二十載無幾時無變之法無一日無過之
人良由誠信有間用刑太繁也臣見陛下好觀說
苑韻府雜書與所謂道德心經者臣切謂甚非所
宜也說苑出于劉向向學不純溺于妄誕所取不
經且多戰國縱橫之論壞人心術莫此爲甚韻府
出元之陰氏鄙猥細儒學孤識陋蠅集一時兎園
寒士抄緝穢蕪畧無可采陛下若喜其便於檢閱
則願集一二志士儒英臣請得執筆而隨其後上
泝唐虞下及殷周根實精明隨事類別刪其無益

勒成一經豈非太平制作之一端歟禮記出於漢
儒蕪雜尤甚宜及時刪改日御經筵訪求審樂之
儒大備百王之典作樂書一經以惠萬世若夫配
天宜復掃地之規尊祖宜備七廟之制奉天不宜
爲筵宴之所文淵未備夫館閣之隆太常非俗樂
之可肄官妓非人道之所爲禁絕娼優俾於變之
民不遷於淫巧易制閹寺尊天子之貴不近於刑
人執戟陞墀皆爲吉士虎賁趨馬悉用俊良雖門
戶掃除之役命公卿子弟之賢任諸侯王於衆職
定久任法而加封木輅朴居而土木之工勿起佈

墾荒田而四夷之地勿貪釋老之壯者驅之俾復
於人倫經呪之妄者火之俾絕其欺誑斷所謂瑜
珈之教禁所謂符式之科絕鬼巫破淫祀省冗官
減細縣痛懲法外之威刑永革京城之工役流
而聽復杖八十以無加婦女非帷薄不修毋令逮
係大臣有過惡當誅不宜加辱治曆明時授時作
事但伸播植之宜何用建除之謬伏見陛下拳拳
於畏天畏鬼神而所謂畏民者則未至也孳孳於
治民治強暴而所以治心者猶未至也染盛之潔
衣服之齊脩舉之時儀文之備此畏天畏鬼神之

末事也簿書之期獄訟之斷詔誥之勤鈎鉅之巧
此治民治強暴之支流也近年以來臺綱不肅以
刑名輕重爲能事以問囚多寡爲勩勞甚非所以
厲清要長風采也夫人自救過之不給何暇効人
之過人自以言爲諱何能有諫諍之言御史糾彈
皆承密旨未聞舉善但曰除奸蓋入人之罪或謂
無私而出人之罪必疑受賄逢迎甚易而或蒙褒
營救甚難而多得禍也陛下進人不擇于賢否授
職不量于重輕建不爲君用之法所謂取之盡錙
銖置奸朋倚法之條所謂用之如泥沙監生進士

經明行修而多困于州縣屈于下僚孝廉人材冥
蹈警趨而咸布于朝省驟歷清華椎埋噐悍闖茸
下愚者朝指刀攝暮擁冠裳左棄筐篋右縮組符
剔履之賤衮繡巍峩負販之傭輿馬赫奕雖曰立
資無方亦豈忱詢有德古者鄉鄰善惡必記今雖
有申明旌善之舉而無黨庠鄉學之規互知之法
雖嚴訓告之方未備紀綱不立節目無張臣欲取
古人治家之禮睦隣之法若古藍田呂氏之鄉約
今義門鄭氏之家範布之天下世臣大族率先以
勸旌之復之爲民表率此不可視爲迂闊而不切

當今之急務也陛下天資至高合於道微百家神
怪誕妄恍惚無不洞矚其謬然猶不免欲以愚弄
天下若所謂以神道設教者臣謂不必然也所謂
傳國寶者臣考按前史焚燬久矣屢求屢得真僞
莫明即真有之區區李斯之書秦政之制何足爲
寶哉地有盛衰物有盈歎而商稅之徵率皆定額
盈也好黠得以侵欺歎也良善困於補納夏稅一
也而茶椒有糧菓絲有稅旣稅於所產之地又稅
于所過之津何其奪民之利如此之密也且多貧
下之家不免拋荒之咎或疾病死喪逝亡棄失今

日之土地無前日之生植而今日之徵聚有前日之稅糧里胥不爲呈州縣不爲理或賣產以供稅產去而稅存或禪辦以當役役重而民困又土田之高下不均而起科之輕重無別或膏腴而稅反輕瘠鹵而稅反重欲拯其困而革其弊莫若行授田均田常平義倉之法積之以漸至有九年之食無難者王公設險以守其國近世徂于晏安隳名城銷鋒鏑禁兵備武以爲太平一旦有不測之虞連郡至望風而靡武備隳之過也及今脩治不宜動衆但勅有司以時整葺開武舉以收天下之英

雄廣鄉校以延天下之後又古時多有書院遺基學田舊業貢士有庄義田有族皆宜興復而廣益之夫罪人不孥罰弗及嗣連坐起於秦法孥戮本於僞書今之爲善者妻子未必蒙禁有過者里胥必蹈其罪况律以人倫爲重而有給配婦女之條聽之於不義則又何取夫節義哉尚書侍郎內侍也而以加於六卿郎中員外郎何職也而以名爲六屬御史詞臣所以居寵臺閣郡守縣令不應回避鄉邦同寅協恭相倡以禮而今內外百司捶楚屬官甚於奴隸是致柔懦之徒蕩無廉耻之節一

爲下官肌膚不保甚非所以長孝行厲節義也臣
但知罄竭愚衷欲言固不止此急於陳獻畧無次
序亦不暇組織成文冀以將來取譽惟 陛下幸
垂鑒焉 上覽之喜公少年有才志封事留中諸
大臣皆忌公 上顧數稱公奇才兵部尚書沈潛
忌公年少得 上意乞改公御史使遠 上公在
臺嘗爲王國用草諫書雪韓國公爲詹徽所嫉已
又爲夏長文作劾都御史袁太疏太切齒恨公公
又時時敢直言竟坐深文得罪且不測 上憐公
召對便殿慰諭賜鏹曰汝歸且讀書十年著述冠

帶來廷又命公修正元史誤及踵成宋書刪定禮
經凡例皆留中公歸家八年 上崩來奔喪有司
劾公母喪未葬父年九十違詔奔喪謫河州衛吏
建文元年召入翰林待詔靖難後召公及黃淮立
御榻左備顧問遂命居內閣未幾又召胡廣楊士
奇金幼孜胡儼楊榮陞公侍讀不數日進侍讀學
士七人並直文淵閣內閣與機務之名自此始永
樂初重修 高廟實錄克總裁官又修永樂大典
古今列女傳諸書 上寵公信用賞賚輒與六卿
等當是時儲位未定 上密詢公公稱世子仁孝

天下歸心以尊奪宗自古致亂 上不應又頓首
曰好聖孫 上曰已喻逾年冊世子爲太子進公
翰林學士兼左春坊大學士初議頗洩丘福等謗
公洩禁中語高煦大恨欲殺公未幾用兵交趾公
力言交趾古羈縻國通正朔時賓貢而已得其地
不足郡縣 上遂踈公出爲廣西叅議李至剛奏
公怨望改交趾永樂八年入奏事南京會 上北
征見 東宮辭去高煦密疏言公瞰 上出塞輒
遠覲儲君徑歸無人臣禮 上怒逮公并至剛下
詔獄十二年正月公卒獄中藉其家妻子徙遼東

至剛不死 仁宗時以宮臣得爲通政尋亦謫遠
郡初 成祖寵信公手書倚任大臣十人蹇義等
名授公曰汝疏其人品十人者皆與公厚善公具
實封對義天資厚重中無定見復原言有德有量
不遠小人劉儁雖有才幹不知顧義鄭賜可謂君
子頗短於才李至剛誕而附勢雖才不端黃福秉
心易直確有執守陳瑛刻於用法好惡頗端宋禮
戇直而苛人怨不恤陳洽疏通警敏亦不失正方
賓簿書之才駟僧之心奏上 成祖以示東宮曰
至剛朕已洞燭餘徐驗東宮因問公建文君所用

人何如對曰此皆洪武中人材事往已不足論又問尹昌隆王汝玉對曰昌隆君子而量不宏汝玉文翰不易得惜有市心耳東宮即位出公奏示西楊曰今人率謂縉狂士觀所論評皆有定見也赦妻子還鄉官其子禎中書舍人正統元年又盡還其沒產公結髮讀書留心經濟任事直前風生電發早遇聖明名動天下晚罹讒毒中道天闕不盡其用其重義輕利遇人憂患疾苦輒隱於心苟可用力盡意爲之篤於故舊及名賢世家之後喜引拔士類或謂其汎愛者終不爲變襟宇闊畧不脣

意細故而表裏洞達絕崖岸雖野夫穉子皆樂親之求文翰者日輻輳率與之無倦意或言有不當與者笑曰雨露豈擇地而施哉文雄勁奇古新意疊出敘事高處逼司馬子長韓退之詩豪宕豐贍似李杜其教學者恒曰寧爲有瑕玉勿作無瑕石書小楷精絕行草皆佳。

少保黃文簡公

公名淮字宗豫永嘉人洪武三十年進士爲中書舍人靖難後上坐奉天門左室召見訪政務稱旨每朝解縉及公立御榻左備顧問或至夜分

上寢即賜坐榻前論議密務不數日令入內閣專
掌制勅既又選五人與共事名直文淵閣是秋陞
編修進侍讀立東宮陞左庶子永樂五年陞右春
坊大學士兼侍讀進講東宮太孫立又兼輔太孫
六年命蹇義金忠西楊及公留守 上稱太子仁
厚有識留汝四人佐太子明年 上北狩又明年
上征胡長沙妖人李法良反太子遣豐城侯彬
討法良漢庶人忌沮太子譖彬公侍太子卒遣彬
擒法良十一年 上再北狩公復留守庶人日夜
謀奪嫡造飛語動搖監國并中傷公十二年坐公

奉表迎 上不敬逮詔獄凡十年獄中有省愆集
自省錄獻陵即位出獄中陞通政使兼武英殿大
學士仍入內閣洪熙元年陞少保戶部尚書大學
士如故支三俸辭尚書俸獻陵大漸太子在南京
未至深機卒禍中外洵洵西楊及公佐鄭襄二王
監國侯太子至公憂危嘔血宣德元年漢庶人反
公留佐二王監國班師始還第二年秋公請老
上賜葬公父來謝賜遊西苑與公侯伯師傅尚書
十一人俱肩輿登萬歲山宴山麓比辭又宴太液
池諭公曰明年朕生日卿其復來至期公至上

喜八年禮部會試貢士。上命公與少詹事兼侍
讀學士王直克考試官十年。景陵崩，公奔喪，留逾
月，辭歸。正統十四年卒。年八十三。謚文簡。永樂初，
黨獄大起，南人避北官者，又有編戍法。公言不可。
阿魯台歸款，欲并女真，吐蕃東西諸部落聽其約。
東請朝廷出誓詞，鑄金定集，諸酋磨酒中飲爲盟。
衆議且從之。公言：夷虜勢分易制，併力一心，後患
滋大。此奸謀不可許。文皇善公言，顧左右曰：淮
如立高岡，遠覽爾輩，直平地見目前耳。賜大寶法
王玉章，示公。璞公言：朝廷賜外夷用勅命，廣運二
寶，此璞大於二寶。夷人將謂法王尊於朝廷矣。皆
從。公言：初與公並入閣者七人，胡儼、早休、胡廣先
卒，解縉沒，詔獄惟西楊秉鈞、最父、東楊謀、幄、最密
並總修累朝實錄。而公園土十年，家食餘二十年。
蒙詔簡牘，君子弗信也。

少師胡文穆公

公名廣，字光大，廬陵人。父子琪，洪武三年爲御史。
疏請遷都關中，已而出爲按察僉事，調知彭州。陞
延平知府。卒。建文二年，靖難兵起，公對制有曰：親
藩陸梁，人心不搖。建文君喜，擢進士第一。更名靖

為修撰翰林靖難後召入內閣陞侍講復名廣改
侍讀陞右庶子永樂五年進翰林學士兼左春坊
大學士勅吏部廣等侍朕日久繼今考滿勿改外
任十二年十一月命公及文敏文靖纂修五經四
書性理大全明年九月書遂成尋進文淵閣大學
士兼坊學再從 上出塞征胡 上時召帳殿語
移時或夜漏數刻遣出道中相失必急遣兵騎肆
出尋諸學士時時顧左右問諸學士來未公不知
兵以文墨論議侍 上備顧問 上不得諸學士
相與語不悅也公敦質簡重持大體存心愛人

上諒其朴厚信任亞於東楊禁廷應對慎密不洩
操履清謹公退輒杜門讀書賦詩寡交遊崇儉素
為文下筆滔滔制命典冊多出其手禮部郎中周
訥請封禪公力言封禪非禮 上斥訥言公因上
却封禪頌奔母喪還朝 上問民間疾苦公頓首
對曰百姓頗安給惟有司窮治建文時奸黨枝附
扳連坐誣善良甚苦 上立命罷追詰者人或毀
公 上不信或遽斥去毀者公善書行草尤善十
六年卒贈禮部尚書謚文穆已而念公官其子種
翰林檢討獻陵加贈少師西楊曰我朝文臣有謚

自姚公廣孝及公始然建文時嘗謚王公禕文節
少保金文靖公

公名善字幼孜以字行新淦人建文元年進士乙
科授戶科給事中靖難後入內閣改檢討數月陞
侍講時翰林坊局臣日講經史東宮凡經義皆內
閣閱正呈 上覽已進講緝閱書士奇閱易廣閱
詩公閱春秋上太子春秋直指三卷五年陞右諭
德兼侍講七年扈巡北京八年從 上征虜 上
歷指所過山川諭公記之登野狐嶺曰至此看山
盡在下矣至興和曰汝觀地勢遠望似高近即漸

平此陰山脊也若因山爲塹因壑爲池守茲巖險
雖鐵騎千群安能飛度耶次鳴鑿戍曰此大伯顏
山其西北小伯顏山東北即開平次環瓊圃指塞
北山川曰古交河在哈刺火州兩河相交水嚙沙
出唐碑尚在次小甘泉曰女直有山其顛有水色
白草木虎豹色皆如之所謂長白山也至長清塞
曰此南望北斗矣經闊灤海曰此周千餘里幹難
臚胸凡七河注其中賜名玄冥池次通川甸遙指
海上石山曰此即三石山十一年扈巡北京從征
虜十二年復從北征陞翰林學士兼諭德十四年

還南京明年扈巡北京十八年陞文淵閣大學士
兼翰林學士二十年扈從北征二十二年復從征
北次開平 上曰朕夢神人語朕上帝好生者三
是何祥也公時聞軍中有訛言因力請班師 上
曰善立命公草詔還次清平鎮宴群臣命內侍歌
高皇詞五章曰此 先帝垂諭敘創業守成之難
戒荒淫酣酗之失朕嗣鴻業惟恐失墜尚相與勉
之遂廣五章言奉天法祖勤政恤民事命內侍歌
之榆木川之變東楊南計公留軍中護喪 太子
即位進戶部右侍郎兼大學士踰月陞太子少保

兼武英殿大學士賜纒紉糾繆銀圖書洪熙元年
陞禮部尚書文三體當是時法司論死罪多寃

上命臨決必三大學士會讞奏公知律例多平反
未幾還省母母卒景陵起公服中爲總裁官修

兩朝實錄明年持節出寧夏冊慶府兩郡王妃還
上封事從 上巡邊度鷄鳴山 上曰唐太宗特
其英武征遼嘗度此山公對曰太宗尋悔是役以
故建憫忠閣至宣府還宣德六年卒贈少保謚文
靖公簡易沈默溫裕有容不肯伐善爭名爲文和
平寬綽類其人子昭伯宣德二年進士

太保高文義公

公名毅字世用揚州興化人永樂十三年進士改翰林庶吉士授中書舍人二十二年改春坊司直郎洪熙初爲翰林侍講正統元年楊文貞公薦公學術醇正克講官修實錄五年陞侍講學士十年入內閣陞工部右侍郎兼前職十四年上北征曹文忠公從行公居守景泰初進尚書工部兼翰林學士是年虜數請使迎上皇侵我上谷雲中急廷議相顧忌不能決中書舍人趙榮毅然獨請往公壯榮解金帶贈榮曰子忠義人也上皇將

至京公言奉迎禮宜厚會有干戶龔遂榮投匿名書公所公袖入朝傳示群公卿群公卿不敢出一言言官疏聞上不喜詰匿名書從何所得公曰得自臣所遂榮恐累公自縛闕下下詔獄上亦不深罪遂榮也二年進少保東閣大學士明年廢東宮爲沂王而立懷獻爲太子公悲憤不敢爭加公太子太傅公亦不敢辭是時內閣不相能公上疏言內外諸司惟賢是用况經筵日講關係聖德尤在得人遂薦大理少卿陳詢侍講楊鼎克日講官左都御史王文大理卿蕭維禎庶子王恂入內

閣上令詢昂侍經筵文遂得入內閣文既入內閣又輒與公相擠五年敕公視南畿災尋還朝力救都給事中林聰得不死七年進少保大學士謹身殿是年首相陳循及王文皆以子不得舉許順天考鄉試官劉文介公儼上令公覆試公曰貴胄與寒畯爭進已不可况從而爲之辭奏斥林廷一人事遂已裕陵復辟內閣諸臣皆流放竄殛惟公以忠謹故英宗曰穀在內閣每議迎駕及南內事輒左右朕穀無他腸可致仕公既歸田杜門不接賓客人有問及正統景泰天順間事者輒不

應公官至台鼎而家業蕭然敝廬瘠田僅足衣食身沒未幾子孫貧窶其方穀端靖潔廉無私卓然有古大臣之風一時內閣七人議論每相齟齬公獨持正嘗曰清議可畏以是見忌於人亦以是受知裕陵成化初姚文敏公既請謚王佐鄺埜又上言公鯁直不回端亮有守始以翰林學士侍英宗經筵入內閣輔政孜孜爲國恪持公論景泰間力主遣使迎鑾之議及其還駕獨建備禮郊迎策天順初以老疾乞歸田里遂卒于家進退有道始終不渝加之贈謚庶表臣節得贈太保謚文義

太常岳文肅公

公名正字季方進士及第授編脩景泰三年遷左
贊善兼編脩天順元年改兼脩撰王忠肅公薦公
宰相材召對文華殿公神采秀發上遙見遂曰
好好公登殿又曰好好問年幾何對曰四十又曰正
好問家安在對曰灤縣曰又朕北方人甚善問讀
何經對曰尚書曰是書經尤善問舉進士科對曰
正統十三年上益喜曰朕固取汝朕今用汝內
閣許彬老矣不足恃汝爲朕努力公頓首受命出
赴閣至左順門遇石亨張軌愕然問曰何爲至此

公不對二人者忌公才名比見上上又言朕今
擇一內閣臣甚佳二人者請爲誰上曰岳正顧
正官小須與吏部左侍郎兼翰林學士二人者陽
頓首賀陛下旣得人俟果稱職進官未晚上
默然然時時召見公公感知遇銳意功名欽天監
湯序奏災異請盡去奸臣上問公對曰奸臣無
主名即求之人人自危且序術疎淺不足信事遂
止亨與堅吉祥表裏擅權有匿名投書指斥時事
罪狀吉祥獨不及亨吉祥怒力請上榜購告捕
者官三品公與呂文懿公見上曰爲政有體朝

廷豈可自榜購募秦始皇杜諫下妖言誹謗令竟
不聞其過以亡國乞以秦爲戒事遂止公又言曹
石驕橫不早制恐禍起肘掖 上諭公汝往告朕
意公徑造亭所諷令戢斂二人者謂公許我短顧
以 上意切我益大恨是年承天門災下詔罪已
公歷數政弊詞極切直二人者造飛語岳正草詔
出時時對人言此非 上意我欲諷 上改過也
正賣直訕君父不數日內批降公欽州同知欽並
南海瘴毒公便過家辭母留數日兵部尚書陳汝
言者黨二人又憾公嘗言其不可用遂嗾邏者中

公私事逮詔獄考掠謫戍肅州鎮夷所未及行李
鐸都督竟奪公廬時猛虎石者太監鎮河西 上
密諭石正須生不須死四年石坐法誅明年曹又
反誅 上息公言解士伍放歸田茂陵即位言官
請復公官吏部擬調南京 上曰勿調留院克經
筵講官預修 先朝實錄未幾南陽欲薦公南國
子祭酒公不應忌者僞爲公劾南陽章示南陽遂
大疑公成化元年廷推公及禮科都給事中張寧
爲兵部清黃官不得陞興化知府公至興化勤力
民事操利權興修水利積穀出羨餘補助民役興

化士人規利弗遂者騰謗書彭惠安公獨曰太守節財愛民無他也三年來朝乞致仕時李鐸敗朝廷還公故廬未幾卒公文章氣節名滿海內抱負經濟屹屹不肯下人再起再廢竟不盡其用嘉靖中贈太常卿謚文肅公自贊有自京師來者傳天語於甘曰岳正倒好只是大膽或以賀正曰上念公如此行召公矣曹生爲馬陋容遂槩括其詞題於上曰岳正倒好只是大膽惟帝念哉必當有感如或赦汝再敢不敢臣常誦古人之言蓋將之死而靡憾也公偉貌美髯言論灑灑動循矩度石

曹事或議其迂又曰未信而諫直應曰渠謂我諫官耶我道當如是人有不可意事雖權貴人當言即言無藏宿以故奇公者雖多忌者亦衆所著有類博稿

論曰解公才高志銳受知三朝皆遭讒忌竟殞其身黃公纔脫縲紲不一二年遂屏迹丘園尤不免于媚姍之口胡公金公入奉絲綸出從羈勒軍旅之事不及東揚而隨事獻納裨補亦多高公素稱忠實遣使迎鑾之議尤壯岳公負才氣直前任事仆而復起益不屑下人皆磊落賢輔臣也

皇明名臣記第八卷終

子履準校正

